

四庫全書

集部

欽定四庫全書

集部

春草齋集卷

三五

詳校官庶吉士臣龍廷槐

中書臣劉源溥覆勘

總校官進士臣朱

鈐

校對官中書臣李

蔡

膳錄監生臣

王叔愚

欽定四庫全書

春草齋集卷三

五言律詩

北郭小樓與友玩月

明月中秋近東樓望眼懸故人俱好在清思各相牽
天極銀潢淨涼浮玉露先
尊如此夕別後更何年

偶作

仰頭看白日無語對庭柯萬事只如此百年能幾何近
人黃鳥過隔水白雲多幸此聊相慰悠然發浩歌

題山水圖

莽莽羣峰合盤盤一徑分牕明丹竈火松冒紫壇雲靈
草千年長名花五色殷仙人騎白鹿塵世已斜曛

蚤朝

驄馬入雲飛霞光上翠旂未央宵月迴長樂曉鐘稀玉
佩依黃幄金章映紫薇御爐香藹藹偏惹近臣衣

病中懷劉庸道

乾坤憎病客風雨暗孤城
野水無人渡林鳥落地鳴
捲簾看竹色歌枕聽江聲
自遣聊終日懷人底性情

余退軒以詩見寄次韻答之

溪山饒景物城市隔烟霏
蠟屐幽時洗霜毫醉後揮
槿花鳴緯近瓠葉蠹虫稀
夜夜潮聲急空驚白板扉

又

坐增新舊感詩寄短長吟
白雪千年調青燈五夜心
湖

吞松寺閣山入野雲深可是忘城郭飈車不下臨

與諸友山中晚行

山林甘寂寞朋友得從容清吹來雙澗斜陽隔數峰敗
田沙草細陰銜石苔重誰料江城客還來躡舊蹤

將赴石龍北流道中有作

局促違清事艱難到白頭一身渾是病兩月未離舟暮
雨聽南鳥晴嵐泝北流到官期報國寧敢動鄉愁

西湖小隱

勝景金池耳高人玉樹然柳塘披鶴氅山崦出漁船梅
吐尊前月松蟠鏡裏天興來彈淥水賞識有逋仙

倪克受惠藥

野曠林烟薄人稀徑草深感時多病客遺藥故人心江
樹移寒影城雲結暮陰五湖千里思一曲夜分琴

送童仲美歸金華

心倦京華客情深故里山不知千石貴自愛一身閒水
氣迷黃柳冰花凝白管到家談勝事歡溢老親顏

題扇頭山水贈殷本初

海上神仙窟分明入畫圖山雲連太白溪水落東湖路
覺行邊斷亭從僻處孤直教殷處士城市跡全無

石龍棠陰道中遲劉淑齋不至

倚風情脉脉回首帽歌歌歸馬夜行疾遠人春到遲林
深雲氣重山靜鳥聲悲萬里天南客誰歟是故知

懷張孟善

目暗曾行路心懸故友家池荷生舊藕畦藥長新芽短

榻微風入疎簾細雨斜空聞常出郭漁屋看桃花

寄韞禪師

孤蹤隨寶地碩德重禪林雨遍龍歸洞天空鶴在陰泉
聲山路靜松影石塘深何日聽高論令人慰夙心

送張彥誠之京

久分依山住今因薦剡行巨魚衝浪躍好鳥及春鳴雙
闕青雲曉千花紫禁晴新除題御筆未覺負平生

寄王彥貞

兔泉探夜月熊耳挹岩霏白玉無塵點黃金似土揮鄉
關心已遂城市跡全稀尚愛慈湖水娟娟照戟扉

又

憶別東臯上經年不共吟塵迷雙病日月照百年心山
色秋霜淺江流夜雨深微軀借君力猶可強登臨

寄桂長史

喜氣騰秋日清飈洒夕霏醉眠門得掩散步袖堪揮奇
遇千年盛生還此日稀慶雲遙入望五色繞金扉

又

青年期豹變白首聽龍吟
迴隔低昂位終同報答心
晉陽雲路遠淮甸雨泥深
共得歸鄉土天光幸照臨

題隱士圖況史僉事

有客清風坐乾坤一老身
昔年曾補袞今日且垂綸
江水為襟帶雲山自主賓
只愁難久遁丹詔下楓宸

高涼鄒通守以詩寄予石龍次韻奉答

廿年求一見萬里得相親
明月寧無酒青山實有隣
天

垂南海闊水漲北溪新不遂重簪盍空慚滿面塵

五言排律

送闡禪師住蘆山四十韻

東漢風聲靡西來氣脉長祖庭森穆穆人物儼跄跄寶
座嚴龍象窮崖冒虎狼騶虞紛晉宋優鉢盛隋唐宋季
猶堪傳今時只可傷有才能卓立無地不懸望公獨嗟
流弊僧中益自強受經依落石執冊傍閒廊素履殊清
苦冥搜極杳茫佳篇追鮑謝楷畫粲鍾王祖父尤明詰

師模亦老蒼劍光生砥石鐘韻響秋霜到處聞英發凌
霄愛激昂六歲巖戶靜三應石雲涼歸去聽鶡鴒飛騰
羨驪駒暫遊靈鷲嶺竟往獨龍岡短榻淮雲表孤筇蕙
帳傍訓僧唯一默倦客謝諸郎雋味時時得徽名日日
揚吾軍真足張季女且深藏故里虛禪刹耆年上薦章
魚腸期破竹羽括果穿楊琴瑟收桐梓林巒宿鳳凰桑
門成架燹天牖豈尋常曹洞花開久蘆山草欲荒祥輝
重煜煜軟語定浪浪神鬼逐奔走鼓鐘諧鞞鞫療人應

扁鵲斂賦肯弘羊我獲叨蓮社神交想竹房往來雖已
久別去未能忘里閑間高蹈間閭借末光天人全友道
地主只吾鄉舊有三生願今當一葦杭爐烟分茗盞松
吹坐藤床心尚驚猿境身猶逐鹿場刀鋸宜為斲弦緩
異更張已覺如鯢化伊誰敢鴈行祇愁離此處翹舉又
殊方萬里皇圖壯千年道運昌願言終自重說法助王
綱

默齋詩五十韻為黃仁則賦

矯俗君思默中情我為申自箴殊攄攄同志故忝太
上安耕鑿淳氓絕喜嘖秋風看落木山鳥聽啼春世道
駸駸降言辭漸漸頻綢羅成頃刻枝葉長逡巡或恐流
為禍深令教以身交承惟禮樂行坐正簪紳悃悃通金
石精誠感鬼神坤元蕃草木天象粲星辰合味宣尼歎
宜追衛武塵三緘銘有為千里繆何因簡冊垂謨訓文
章重石鈞庖言當日出詳說總天論一字難輕議千年
不易泯郢斤寧見堊扁斲似無輪亦有情難輟仍多志

欲信駿明遭叔向子產罪諸陳肯為名誇世非圖口禦
人嘖嘖如酈陸喋喋類儀秦吾悼今成俗人胡不反淳
笙簧爭鼓舌劍戟起搖唇燭毒先甘軟狐疑劇苦辛誓
將懲澶漫直欲掃譴諄絕意鳴堅白無心著美新輕浮
機不密繁縟道逾湮雍也何曾佞回歟只守仁坐忘終
不妄目擊自全真張鏡心非窳田光學未醇殺身空殉
節杜口鑒羣倫月旦從評我春秋任直臣閒居甘寂寞
終老謝紛紛蠡測聊如此龜占諒未臻頽波誰復障古

井獨無淪涉澗衣嘗揭滋蘭佩已紉文能傳紀述策可
應咨詢閱歲知非近摳衣見是親扁齋猶自警修軌足
堪遵舊日曾趨座於今願卜隣靡爭為避世無諂豈嫌
貧水際看花柳山中迭主賓遠矜雲作介旁禮石為僕
明月青松榻涼風白氎巾彈琴通至意揮麈示玄津醉
眼耿耿共虛懷衍衍均喻觀齊物馬詩想二南麟似是
安成訟終將免邁屯未優金馬詔且作葛天民綠野馬
推度黃山絕勝鄞只愁難遂志耿耿對高旻

送月公赴南臺中丞

天子憂時劇中丞憤世深
新除端有為舊制匪斯今
顯席非常列兼官秉至忱
南司名重大北面氣蕭森
矧復才為冠多聞衆所欽
雄文鳴玉闕御酒醉瓊林
立志葵傾日遭時早作霖
諫言書亟草上殿筆嘗簪
既盡樞機職還勝管轄任
霜臺宜奏劾石室且披吟
拜詔辭丹陛加恩賜白金
贈言分藥石佳製粲瓊琳
渤海精神王鄴江節仗臨
清風留冀北瑞靄起山陰
再得扶元氣終能

播德音聖心全付託儲貳有規箴唐介應推轂虞眉必
就擒騰看嚴紀律何但作喉襟近日堪流涕諸賢漫用
心忌人祇比毒當語竟如瘡蕭艾常波及芝蘭每陸沈
幸公持正色揮手拂妖祲王室猶分寶蠻方尚獻琛窮
民來肺石小寇直蹄涔虵虺寧當劒蜩蟬可亂琴升平
期漸漸恢復諒駸駸論道裨皇極遯才絕孔壬太羹回
澹泊縵樂遠哇淫感鳳吹簫管烹魚漑釜鬻一人不有
變萬姓得無歆芹意何堪獻樗材豈願尋還朝惟望此

勲業埒高岑

遊香山與王徵君子信途中聯句

一路覓幽題過橋東復西

王

竹疎林影薄水小澗聲低

鳥

食籩庖人負詩筒稚子攜

王

緩行因惜蟻久立為聽

鵬鳥牆眼泉龍隱籬腰土犬啼

王

古藤如臂曲矮樹與

肩齊

鳥

過隴虎留跡投巖麝脫臍

王

尋芝問溪老摘果

借鄰梯

鳥

瓦罐煨椒酒沙盤飮草蘼

王

漱甘分冷井縱

懶卧桑萸

鳥

窑熱燒松火潭香洗藥泥

王

塘坳飛絮滾

石縫落花栖

鳥健

栢攬頽廟荒苔補破蹊

王

紫拳擎蕨

菜青子落棠梨

鳥

樵語烟蘿屋僧鉏雨豆畦

王

歸來日

當午雲外一聲鷄

鳥

春草齋集卷三

欽定四庫全書

春草齋集卷四

明 烏斯道 撰

七言律詩

登粵王臺

臺上離離碧草生
風雲盤礴倚孤城
天空百粵山光遠
地控諸番海氣清
萬里壘書曾落膽
千年鐵柱見銷兵
英雄一去知何在
幾處鷓鴣秋雨聲

送王益謙之京二首

笑看車馬去堂堂玩愒人間歲月長
文似健兵能力戰才如良賈只深藏
烟波一釣非無具花柳孤村自有莊

滄海遺珠留不得隨龍飛起落清湘

先任湖南安仁縣

其二

東歸三載別湘潭豈料都門重解驂
風近香車清閣道雲移宮樹拂朝簷
高臺氣轉鳴丹鳳疊嶽春濃滴翠嵐
老去客懷傾未盡更期朱紱在江南

遊海珠寺

吟到中流一凭欄
雲烟散盡水天寬
靈鰲化石支金刹
神物凌波弄木難
隔岸市塵千里遠
炎風禪榻九秋寒
何須更覓三神島
消得攜琴此處彈

凌雲軒為泰和蕭君賦

壯氣從來北斗齊
憑軒高眺白雲低
風清竹樹孤村靜
天接溪山一鳥啼
新酒每從花底灑
好詩都向壁間題
元龍何必樓頭卧
待爾來遊日杖藜

送汪以敬歸睦州省覲四首

楊柳池邊燕子飛，
藜床低小竹邊移。
雲天華嶽持高論，
秋水芙蓉出贈詩。
咫尺動成千里隔，
綢繆終有百年期。
去年曾下清風榻，
話到無懷未出時。

其二

封豕封狐在眼中，
此時端合見英雄。
扶持短世非無術，
賈勇長才獨有公。
出看旌旗人似雨，
不鳴刁斗月當空。
秋風曾灑滂沱淚，
血濺中原滿地紅。

時領團練

其三

官事蕭閒故友多，每因持酒發悲歌。
石生叅幕真無忝，徐庶思親可奈何。
千里歸帆如健馬，滿天急雪似飛蛾。
高堂舞得斑衣破，也勝朝衫剪越羅。

其四

幾番相約話騷離，月出花開酒一卮。
去郭自穿東郭履，出門空詠北門詩。
暝雲接地山昏早，急浪衝沙鴈落遲。
歸到嚴陵煩一問，高臺垂釣只今誰。

中秋遇雨次趙之才韻

淒風冷雨正綢繆佳節難將酩酊酬何處自看今夜月
好懷空待一年秋燈昏遠市更初咽雲抱寒城地欲浮
明日先生賦歸去何當挾我到瀛洲

次韻酬范運中

讀書牕前烟草深三年獨守荒山陰出門駕輿輿脫輻
閉戶燒鉛鉛不金唾壺擊出慷慨意青燈照見平生心
故人苦道不相見寄詩復欲招我吟

送夏均禮之京二

歸來朋舊曉星疎，只過東村水竹居。
老氣竟消雙目暗，足音還冷一年餘。
絕憐風月尋常酒，寧問江山咫尺書。
況是送君天上去，柳邊空為立踟躕。

其二

採芳終日水雲鄉，豈料天書落耿光。
玉氣久曾衝碧漢，鐘聲今復起清霜。
鶯隨野館穿林語，花近仙舟隔幔香。
此去莫遲春日路，鳳鳴先已在朝陽。

野堂為朱夢良賦

天台何處足幽居，委羽山前一草廬。
田繞薜牆都種秫，沼通溪水賸栽魚。
桃花每落尊中酒，鶴影時浮几上書。
一走功名為客久，不知歸夢近何如。

涵虛館訪章復彥不值

館在月湖中
賀知章宅也

春風奈此玉人何，賀監宅前春水多。
茶竈筆牀天上坐，酒船花擔鏡中過。
紫騮何處嘶晴日，白鳥當門弄碧波。
更愛小橋楊柳外，石闌閒倚聽漁歌。

章復彥許畫菜作詩促之

采葑何必首陽東
翠葉歲蕤在眼中
傾國可堪誇絕艷
灌園端合想連筒
遲徊公館應無事
洗滌膏粱信有功
老我不能忘此味
幾回題品學涪翁

答馬易之編修次來韻

史臣出入承明廬
珠玉娟娟落海隅
天上故交多國士
月中閒坐憶樵夫
董狐無媿春秋筆
賀監寧忘日月湖
深喜欲歸先有信
輶車秋盡出京都

劉羽庭太守攜酒訪余北郊贈詩荅之

蕭蕭五馬出林郊
窄窄幽栖在草茅
康樂有詩曾夢草
少陵無酒繼行庖
倚欄天接清江表
俯几雲飛綠樹梢
豈料高情千載上
竟忘身與布衣交

送王元魯歸吳

王郎作掾歸東吳
才名已與功名俱
道上爭看白鵲鵲
海中暗長青珊瑚
西湖竹枝正好聽
北海柳癭安可無
若見林逋為傳語
烏生不愧麻衣簷

題李尚賓御史九峯山房圖

九峯山人不復作一時佳話至今存瓦盆盛酒醉賓客
土穴貯書傳子孫樹暗昭陵青滿席泉通渭水碧當門
幾番欲往觀陳迹無奈秦關隔夢魂

月夜渡水訪童有嚴錙子明及其子庸道

月明荷淨不相能渡水尋幽興倍增童氏情懷清廟瑟
劉家父子玉壺冰鹿鳴筵上千年調魚得門前半夜曾
它日但留詩滿壁此時何惜酒如澠

遊梅谿贈張維中

小舟出郭八十里不意好山如此深溪水尋常沒行路
地氣容易生夕陰遠尋隱者勝采玉曾與故人如斷金
安得比鄰有閒屋君歌古調我彈琴

送吳季章遊東湖

東湖處處好風景一處應為一月留九壠高寒宜結夏
二靈空闊好吟秋花香度水來禪榻山色隨雲落釣舟
筆底梅花清興動總將風月換羅浮

太松場俞少府歸隱

處處妖氛漲碧天，抱琴歸去卧林泉。
詞人未獻河清頌，國賦猶尊海玉篇。
月到金池空似舊，花連鐵甕得如前。
野人亦有雲林興，又向江城過一年。

題嘉上人寄懶軒

白雲峯頂飛焦土，青林渡頭多綠苔。
寒澗自流門半掩，禪牀不下客長來。
晴風野馬經簷過，細雨牽牛倚樹開。
餘子正從官道上，紫纓紅帽走塵埃。

次韻禽有巖

錫山曾有白雲期別後多君只自怡
三復寄書長歎息幾迴攜手即睽離
茅堂隔水還相覓人物如林獨見知
從此一觴須一詠古人茶宴亦留詩

登九成臺

在韶州帝舜南
巡彈琴于上

重華不見獨登臺臺倚孤城日月開
似聽簫韶千載上虛疑鳳鳥九霄來
亂山北起迷烟樹雙澗南流浸綠苔
回首蒼梧天咫尺南巡曾帶蹕塵迴

遊南華寺

六祖衣鉢之處有大塔藏真像其中

臺殿參差出翠微
曹溪當戶漾清輝
人知碧眼胡僧遠
誰識黃梅獼猴歸
燕雀不棲千丈塔
風雲長護六銖衣
嶺南第一唐朝寺
細讀殘碑倚夕暉

賦王景章拙齋

諸子便獮方得意
我心椎魯動違時
能言鸚鵡休相笑
鈍足駑駘不自支
山屐每因春興著
酒船長信晚潮移
靜看爐鞴長施巧
此日黃金合鑄誰

劉羽庭太守攜酒晏倪氏池亭

太守攜壺看藕花倪家池館似仙家佳人行酒杯頻覆
童子催詩鼓數過鳥傍竹陰啼側島魚翻日影近晴沙
珮環未入天台去几席叨陪豈有涯

送王公中丞之山南廉訪三首

御屏多寫大臣名故老尤關聖主情每從翠華行閣道
或承丹詔作長城尚衣蛺蝶飛羅袖內府蒲萄滿玉罍
幾度鴻臚催賜出此時仍復被恩榮

其二

自昔南臺肅紀綱
明公此日更堂堂
秋霜落處無蕭艾
繡斧行時得豫章
賀監湖中看月色
蓬萊閣上望天光
誰知驄馬東來後
古栢啼烏自夕陽

其三

江郊歇馬一從容
再近光儀咫尺中
自喜昌黎憐賈島
敢期工部際嚴公
林亭每侍金尊酒
草閣時來玉珮風
獨念總戎催視篆
無由裨補罄愚衷

題泉上人容膝齋

世上木妖空突兀山中茅屋好盤桓
斂裳宵逝陶元亮坐榻皆穿管幼安
紫石繞簷雲起伏碧流當戶月清寒
上人遮莫傍人笑自覺維摩丈室寬

倪氏池亭陪羽庭太守燕集分韻得東字

高軒新構燕諸公捲起朱簾卷畫中
八月紅蓮猶待客半天青柳自生風
水絃促柱催歡伯玉版題詩觀醉翁
且索虎頭圖此景明朝踪跡任西東

送楊敬修之京

春江雪後水偏多，十日輕舟入御河。
匡國喜遭新主聖，別君無奈舊情何。
花圍仙館從容飲，月照池亭慷慨歌。
他日風雲千里隔，自看白鳥下滄波。

次王公中丞杜若湖泛舟

百頃風潭一葉舟，神仙李郭鏡中浮。
從容杜若羅生處，蕩漾芙蓉欲盡頭。
茶竈筆牀延落景，水雲沙鳥汎清秋。
可中增觀非疇昔，歸去山靈似再留。

送高麗相還國

琛貢中朝使節持樂浪人物好威儀董生作傳曾匡國
季札來賓解聽詩喜動龍顏天咫尺行經鰲背路倭遲
陽春不隔黃岩水歸及看花二月時

碧筒飲

翠葉清宵作巨觴碧雲半捲出方塘柔絲尚帶冰蠶口
細竅遙通玉兔光漏瀉渴烏隨點滴汞搖丹鼎慎遮防
醉魂飄蕩三更後自覺滿身風露香

和史樵雲春興三首

愛此江山几上青
故辭城郭到林垞
濟時難作隨龍雨
漸老無過先日星
牛角悲歌非甯戚
鹿裘孤坐且瞿矧
鳳凰若解鳴當世
却向溪頭洗耳聽

其二

天下車書已一家
樵雲猶是舊生涯
落花空館聽春雨
流水孤村數暮鴉
鶴怨猿驚知後日
龍蟠虎踞是京華
君王長慰庭臣渴
不賜黃封即賜茶

其三

山深路僻少人過早晚惟憑七字哦
歸思不隨流水急閒情渾似白雲多
花開躑躅紅千樹笋長簣簣綠數窠
想得此時如杜甫池亭對酒愛新鵝

過十八灘

章貢同歸十八灘灘灘斜轉落奔湍
蒼龍出峽雲山動白馬嘶風雪坂寒
石起亂堆沙淺淺舟牽百丈路盤盤
鷓鴣又復啼秋雨便合重題蜀道難

登望湖亭

秋風登此望湖亭
烟水微茫接窅冥
地坼荆揚天下壯
龍更秦漢至今靈
神倉氣吐漫山赤
廬阜光飛隔岸青
回首老蘇仙去遠
獨留詩句挾風霆

登小孤山

孤峰平野忽巔峴
第一關頭樹影寒
直上雲霄扶日月
半橫龍窟障波瀾
地分南北青天闊
江入東西白水寬
回首柴桑纔咫尺
欲尋元亮問休官

秦養浩隱居養母造訪貽詩

聞說衡門賦考槃故緣深徑覓清歡行厨愧不如嚴武
命駕徒能學呂安大石滿田春蘚濕亂藤垂屋夜雲寒
茅堂為下青燈榻千載高情未覺難

其二

茅堂低小竹林幽母子相看共白頭絳縣又逢新甲子
老萊渾似富春秋野田雲暖黃鷄啄山甕春濃綠蟻浮
天上昇平甘此樂讀書惟欲老林丘

次韻龔楊士廉二首

鐵崖仙去夢魂安之子先登上將壇
筆走龍蛇誇旭聖詩成錦綉薄郊寒
敝裘正想雲間脫長劍空於海角彈
昨夜偶來陵水上滿天明月為同看

士廉常從
楊鐵崖遊

其二

壯遊無復夢長安到處披雲卧石壇
石化五羊雲氣暖井涵孤鳳月華寒
瓢因有酒何勞棄冠為無塵不用彈
再入龍山須過此蓬萊天地待君看

士廉以事赴廣州
過予石龍石龍有

鳳凰井求予作蓮壺
齋記故末句及之

從心齋為丁自南真人賦

黃河南下客神京不訪移文訪冶亭中岳使回尊更綠

故山兵後樹還青籠鵝逸少曾留帖相鶴浮丘已著經

三十六房隨處坐白雲終日護岩扃

自南先客燕翼今
避南京冶亭在朝

元宮嘗奉
使祀中岳

廣東留別胡長之

君住三山我四明一時傾蓋五羊城歌求伐木詩中意

琴聽歸樵曲外聲鶯囀上林春色好風生南海瘴烟清
懸知兩地還為客明月如何此夜情

清嘯軒為吉水王子常賦

孤懷耿耿向誰開長嘯清風亦快哉柳下一聲山斷裂
隆中餘韻月低回蒼苔白石江光動小几疎簾樹影來
何似心遊天地表壁間詩句掌中杯

題秋江獨釣圖

綠筠紅樹滿芳洲此處垂綸獨對秋身世百年雙白鳥

風烟萬里一扁舟
水明鮫室珠光動
日照仙山玉氣浮
只恐天才微漏泄
文章傳到鳳池頭

送陳生往建寧省覲

一路青山數百盤
建州山盡野雲寬
燈明夜市如吳會
花重春城勝錦官
繡紙出溪開玉版
石茶憑水試龍團
尊親拜後應相問
獨卧滄江草閣寒

送契尚賓使高麗

幘溝淩在扶桑下
海闊雲深萬里餘
周禮最優箕子國

漢廷寧惜尉佗書
蟠螭新鑄藩王印
綵鷁安如陸地車
聖化大行歸復命
赤心應念賜衣初

六月伏日同謝彥實倪氏池亭小酌

交深交淺情俱好
花落花開宴屢嘗
佳會一時雲乍合
虛亭六月水生涼
瓊芝成凍分金碗
蓮實泛杯擘翠房
公慙此時曾縱飲
錦箋寧有墨蜚香

上天官尚書予初以布衣上京作此求退

九重頒詔拔儒紳
海內均霑雨露新
倦鶴豈能沖碧漢

殘花無復向青春
螭頭秉筆文章伯
鳳輦含香骨鯁臣
黼黻皇猷今已盛
觥生甘作太平民

謁徐孺子祠

南州高士人世表
東湖祠堂烟水中
聲名不藉陳蕃榻
風節寧虧漢室功
牕戶遠招江月白
衣冠遙隔市塵紅
穹碑久刻先生傳
故使登臨一徑通

題周樗菴隱居

滁州太守老樗菴
橘園投閒只自甘
門戶背通深巷北

溪山橫絕小樓南
春風鳥跡分花徑
晴日蛛絲罥藥籃
一月不聞城府事
晚涼隨處倚清酣

其二

出郭南來直到山
山雲飛落小牕閒
熟知塵世空多事
已就仙人乞半閒
隣圃雨餘分藥去
溪潭日晚射魚還
霜醪不用橋南買
春鳥春花亦解顏

送友人夏仲儒赴京

千里輕舟起白沙
海中寧戀棗如瓜
行人遠召趨金闕

錫燕重看近翠華
鍾阜雪晴松換葉
秦淮春靜浪無花
衰翁正是忘年友
元夕觀燈想到家

七月十五夜對月次蔣孟瞻韻

清虛之府在眉端
忽見駉鸞下紫壇
昨夜不如今夜坐
老年那似少年看
魚龍出水金波動
鳥鵲無枝玉露寒
定遠雲深鄉夢斷
酒尊空復恨長乾

卧病江樓為熊大叅被讒而作

力疾江樓看雨晴
風吹衣袂暮寒輕
雲山遠笑如霜髮

鷗鷺深憐舊日盟
半榻生涯違著述
百年勲業負昇平
青天一嘅終何事
朝菌空於土上榮

題崆峒圖送龍虎山何仲旭遠遊

遙望崆峒入窅冥
幾回招手問山靈
洞雲直到于今紫
林木猶含太古青
葉滿舊爐存宿火
蘚封深穴有遺經
臨風便欲隨君去
先向江頭洗鶴翎

森玉軒為上虞徐隱者賦

徐家軒外玉森森
都是簪簪滿故林
亦有尹孚生琬琰

豈無環珮動璚琳
琴書靜坐延秋思
枕簟高眠對夕陰
我欲贈君持白石
金罍遙望碧雲深

送樂生楊彥益還神樂觀

海上清風拂綺寮
又歸神樂觀笙簫
鳳凰鳴處紅雲近
鵝鵲開時絳節朝
鍾嶺鶴翻高樹雪
秦淮水落大江潮
回頭莫問安期信
瓜棗於今久寂寥

周瑜墓

已丘一卧夢初殘
遂使江東失羽翰
不恨荊州通蜀道

最憂赤壁走曹瞞山光上下風雲壯江影微茫草樹寒
千載尚憐雄傑士有人簫鼓獻盃盤

送於彥仁歸南昌

太平隨處樂年華何惜金錢付酒家浪駕客船魚作媵
雲迎仙佩鹿將車空山日射琅玕樹小渚春明杜若花
歸到南昌須一問琳宮鐵柱在泥沙

過大庾嶺

昔年南去入梅關今出梅關又北還瘴癘偶然全朽骨

梅花不必笑衰顏
泉探卓錫寒松底
碑讀荒祠荔子間
更立西風凝望久
五雲飛處是鍾山

送王允恭歸廬陵兼簡王子讓

西津倉卒送歸船
未盡清樽話昔年
感子遠投雙白壁
嗟予空守一青氊
天開左蠡湖光迥
月滿南山桂影圓
若見古城三當老
為言消息底茫然

江上逢春二首

江上逢春坐不歸
只將無語對斜暉
神龍作雨猶三變

大鳥沖天祇一飛，木偶衣冠成底事。
銅人絃管謾藏機，仰頭遙望雲飛處。
誰結茅堂在翠微。

其二

江上逢春羽翼生，落花飛近柳邊城。
陰雲欲雨還無雨，好鳥能鳴竟不鳴。
鬼物也知憎命薄，文章偏喜逐官行。
典衣沽酒無衣典，月照空樽只自明。

題嶼公所畫湘江萬竹圖

遙望東南萬竹林，連岡度坂玉蕭森。
滿天風雨湘雲冷，

落日魚龍楚澤深
翠袖倚時人去遠
黃頭歌罷思難禁
老禪揮洒緣何事
勾引新詩作鳳吟

陪桂彥良先生宴董氏荷亭

白頭賢傅晉陽歸
十載風塵故舊稀
重會豈非天有待
盡歡寧覺地相違
雲分野色來池館
雨挾花香到客衣
處士要題詩滿壁
金盤甘露博珠璣

澹然齋詩為澤上人賦

太白歸來萬事慵
簾垂雲影石房空
虛名遠付飛鴻外

勝地冥觀落照中浮蟻盃從何處綠來禽花自及春紅
軍持獨有曹溪水千載餘甘與蜜同

張丞書來許舟相迎舟竟不至戲舍

玉人空寄錦雲箋目斷蛟門動隔年昔日移山曾泣鬼
如今縮地却慚仙雲隨魚鳥江天闊春到鶯花野日妍
渡口柳條應見笑夕陽長有落潮船

謝李弘道寄靈壽杖

寄來仙杖費追尋滿谷雲霞太華深元氣百年搏紫玉

故情千里重黃金關河迢遞懸愁眼宮闕森嚴負素心
敢望孔光霑寵錫且須扶老舊園林

東湖

東湖天闊岸縈迴一曲中間有鏡開漁艇每從山後出
佛燈多落水中來凌寒身在清虛府訪古人行紫翠堆
鮑益廟前情不盡白沙青石陰蒼苔

二靈山

東湖闊處二靈山龍吐雙珠落水間四面亂峰雲氣白

半天孤塔土花斑當年馴虎歸何處今日輕鷗只自閒
問訊老僧詩句好清風謾謾滿松關

悟空寺

層樓傑閣護慈雲暮鼓晨鐘咫尺聞峯削芙蓉天際好
逕隨蒼藟澗邊分清風玉佩來仙侶靜夜篝燈檢律文
大海一漚吾未解何當從此謝塵氛

育王寺

鄮嶺名如鷲嶺傳刹竿無恙已千年地雄南土居三佛

山盡東溟倚半天宸翰香浮高閣表岩泉清出老松前
遊人自覺虛生白猶覓神光上客船

又

靈踪深閤壓東南樓閣丹青閃翠嵐燈影半空搖上塔
爐薰千載出西庵山看玉几無雲好泉取金沙淪茗甘
細讀長公碑刻畫黃昏萬丈覓龍潭

遊獅子山龍潭

萬壑千峰競鬪奇窮探愁見夕陽低乾坤自是開圖畫

今古誰能盡品題風攪飛泉晴亦雨雲封洞口到猶迷
更憐勝地多神貺却恨仙人不共棲

嘗桔徐子實家

竹下圍碁送夕陽野雲飛盡水風涼已收殘局看花飲
更喚佳兒剪桔嘗蒂濕尚含清曉露味甘何待滿林霜
誰知又食家山果舊歲茲辰在異鄉

城南

明州僧寺壁間有荆公
詩洪孝子董黯廟在焉

城南風景舊時聞近日長來倚夕曛斷碣有詩王相國

古祠無主董徵君野橋一望時春水老樹千年獨暮雲
咄咄與誰論往事白頭村叟自畊耘

相山偶作

青山四繞出無門半日從容坐竹根目送溪流入東海
心隨秋日照中原石頭繞路如人立藤蔓和雲落地繁
便合買牛耕谷口人間何處是桃源

天鏡亭

亭中危坐月輪孤何必西遊賀監湖白水搖光千頃闊

青天倒影一塵無，魚龍不敢生風浪。
鷗鷺何須伴釣徒，當日胡公深納事。
此中端不許陶朱。

登蔣山

作鎮皇州勢獨雄，英英紫氣散晴峯。
龍蟠實為金陵重，鶴怨曾因蕙帳空。
雲擁禪關新建塔，花明潛邸舊行宮。
試凌絕頂閒憑眺，錦繡山河感慨中。

寄鄉中諸友

五十餘年物外身，一官誰料負清貧。
受金遭謗空慚我。

全壁歸來有幾人
鳬驛雲間明月曉
鹿山風靜野花春
諸公足遂家鄉樂
耕釣終須作隱淪

題海角石

在廣東省治後

石起孤峯指北堂
娟娟玉筍半尋強
氣涵海底千年潤
地引山根一脉長
昔日誰留清玩在
閒雲自益小亭涼
一從開闢高多少
直欲從容問五羊

遊寶峰庵和僧穆庵韻

俗名茅庵

亂山窩裏縛禪庵
路轉東溪漸向南
林鳥每留閒客住

野猿時對老僧談
庖分夜雨巖前溜
閣貯秋雲塢內嵐
誰把新詩題瘦竹
一枝搖動翠氍毹

譚節婦

城破兵連遠近村
皇皇趨入泮宮門
甘從烈士捐生義
不學降臣負主恩
氣逐彩雲隨劍化
形摹青血與碑存
我來感悼前朝事
為立穹碑慰古魂

弔錢融堂先生

先生嚴州人受學於慈湖楊文元公之門及歸弟子千人

哭罷麒麟幾度秋
何人重賦我心憂
詞章謾似機中錦

身世空如水上漚今日修文應帝召淳風接武獨嚴州
昔人曾挹慈湖水傾瀉桐江浩蕩流

春草齋集卷四

欽定四庫全書

春草齋集卷五

明 烏斯道 撰

七言絕句

闕峰

春山花發雨霏霏
花雨曾霑闕相衣
今日山花依舊好
東風吹雨濕僧扉

山居二絕

大兒田頭車未歇小兒牽犢已歸來茅堂正對佳山水
種秫多令辦酒材

屬玉羣飛水下灘松杉蔭合草堂閒蒼頭掃逕非因客
自愛從容出看山

題釣圖

我欲滄江把釣竿含沙拍塞可心寒此中端是誰家子
秋水孤舟坐得安

棣華亭為泰和蕭鵬舉賦

花開
四季

玉片英英著淡黃獨憐紅萼為同芳東風不敢枝頭急
燕子飛來日正長

昨夜薰風放好花朱簾碧檻玉人家世間炎熱難開眼
且向中宵挹露華

深深亭院鴈來初華萼聯輝錦不如見說玉皇新下令
清霜不許到前除

花遲花早自相依積雪初融日影微
微軫有詩聽未徹
鵲鵲枝上一雙飛

題畫三首

江水江蒲隨路轉山雲山樹逐人來
青春不負騎驢客
恰待鳥啼花亂開

水氣騰騰浮草閣山光冉冉落楸枰
不知此地誰為主
招得幽人有勝情

白雲滾滾扶山起碧蘚離離着地勻
赴隴鶴書天外遠
草廬空老讀書人

送陳省之之永嘉二首

幾度尋師叩竹扉等閒却立見天機
春山杳杳浮雲出湖水涓涓白鳥飛

西堂今過幾春風須為慇懃問謝公
烏氏齋中春草碧夢中幽趣得相同

題墨梅

松齋不寫玉纖纖瘦影依稀隔翠簾
越女漫誇天下白我心偏喜邑中黔

題蘭

血淚中原草不芳幽花山上獨飄香倚風一笑青春過
只把深心答太陽

題畫馬

目光閃電氣衝霄幾度悲鳴夜寂寥萬里沙場風颯颯
將軍誰是霍嫖姚

過張氏耕隱二首

四野茫茫雲接地幽禽嘎嘎水連村明年學汝鞭牛法
只恐移家入鹿門

秣米秋香足酒材長歌夜起不成哀
何時推却犁鉏柄
白幘烏鞵入郭來

為順上人書禊帖後

牝牡驪黃都莫猜只看形似亦佳哉
近來無地無蕭翼
珍護還須過辨才

吳季章松齋

江海歸來雪滿顛青松老大屋平安
日長宴坐清陰底
松子俄然打竹冠

和劉彥高倪氏園亭即事七首

最愛倪家水竹居
地偏人靜石牕疏
去年捲地西風起
不廢東齋滿架書

接得劉公一紙書
從容鄴瓦滴蟾蜍
錦葵碧篠閒雲底
小几疏簾暮雨餘

池無鵝鴨惱菱荷
島嶼春來竹樹多
只許幽禽啼戶外
醉眠長日到無何

水中荷葉捧青蛙
沙際鳬雛啞
蔣芽蛺蝶也應憂
未解

故依諼草伴閒花

雪紙亂山春藹藹
氷絃流水夜濺濺
胡床燕坐沈烟起
寫入天台骨也仙

諸公相引入西京
誰似高哉魯兩生
滿榻清風同笑語
閒居相去一牛鳴

蜻蜒上下波光靜
戴勝飛鳴桑葉疎
金瑣乍開籠慣鳥
瓷盆欲放釣來魚

櫻桃

南風南圃綠雲攢滿樹紅堆瑪瑙九翠羽飛來休啄破
未曾供奉赤瑛盤

睡禽

昨夜春風不作寒幽禽飛下碧琅玕只應此地無繒繳
不獨身安夢亦安

柳橋

柳枝撩亂春風急燕子低回曉雨晴步屨不須琴與鶴
可中泉石有餘清

甲寅臘月十日自石龍赴廣州會城途中紀行

石龍今之
化州地也

龍母山前曙色微故人相別思依依五羊仙子知何處
一片征帆帶雨飛

雨歇北風生曉寒湍流初急進船難路從螺蚌灣頭過
羨殺輕鷗卧石灘

兩山不見臨溪屋長日還無喚渡人逆水孤舟行數日

哀猿空使淚沾巾

此地
有猿

亂石排溪急水懸夕陽衰草白鷗邊
明朝短策穿雲去
不似舟中得穩眠

廿里徒行萬里遙難於孤艇逆春潮
自從羸馬歸官後

便合還山作老樵

此舍舟度嶺時也畜馬已被官賣故及之

直上龍威萬石梯翠蘿遮日白雲低
須臾又作沙鷗伴

筏上吟詩下淺溪

磷磷湍瀨雪兼風短筏蛇行亂石中
今夜好從何處宿

笑將蠻語問山翁

中天晴日斂山霏，猶有高林露滴衣。
欲就石崖題歲月，湍流催筏去如飛。

出水雲山幾百重，迴流猶是學蟠龍。
綠溪貫酒無村舍，終日娛人只老松。

道出容州蚤泊船，可人相見玉娟娟。
隔溪咫尺神仙窟，不得幽探小洞天。

是州諸僚皆能文，隔溪山有都嶠洞天。

水天空闊兩山齊，茅屋參差竹樹低。
千里客懷誰為寫，一聲春鳥隔林啼。

舟到崧臺是歲除鄉人一見勝家書綢繆已拚三更醉

又復聯床話故廬

崧臺在肇慶府時有同鄉宰高要

青天闊處是藤州遺跡空尋秦少游樹壓古城人影寂

夜深江月下高樓

少游謫此城上有江月樓

舟泊蒼梧挹渚風九疑何處弔重瞳兩溪流水浮雲底

四面青山夕照中

此梧州郡也

為愛嘉魚不放舟從容訪古入林丘回仙不見空祠宇

白髮黃塵起暮愁

梧州南門外有嘉魚亭上有呂祖祠

渚清沙白野雲寬一棹隨風下石湍客裏逢春須盡醉

只無生菜試春盤

此日立春

題江山枯木

長江水落見龍亭老樹風高墮鶴翎故里好山歸夢遠
春來空有蕨芽青

咏梅花三首

繁花枝上蝶成堆盡日春風解不開正把貞心傾曉月
角聲休度石溪來

道上輕埃逐錦韉
山中孤潔似神仙
多情最是清泠水
照見冰容似去年


笑顏如玉為誰開
綠髮仙人倚石臺
昨夜雪晴天似水
直教明月為徘徊

題慈湖書院壁

法坐十年有哲人
考鐘伐鼓薦繁蘋
騰騰車騎門前過
誰識慈湖二月春

乞休

蚤年騎馬聽朝班
頭白還鄉看舊山
澗水松風應笑我
老來方得片時間



春草齋集卷五